

La pcd ha prendì tuttas parolas unanimamain

Recumandà co votar cun sclerir ils fatgs e lur consequenzas

■ (anr/gc) **Ultra da la nomina da cuss. gov. Mario Cavigelli per la regenza, el è era president da quella per quest onn – stà ina chausa be formala, ma impressiunanta – ha la Partida cristiandemocratica (pcd) dal Grischun prendì unanimamain parolas per tut las votaziuns federalas e la chantunala dals 9 da favrer.** Il president da la pcd, cuss. dals stans *Stefan Engler*, ha pudì beneventar venderdi a Domat in grond dumber da delegadas e delegads – ed en tut spezial er il parsura da la pcd svizra, cuss. naz. *Christoph Darbellay*, che ha era cooperà cun in votum persvadent. L'introducziun è sa fatga en

tuts trais linguatgs chantunals cun mintgamai resguardar problems specifics da quellas regiuns. Secundà ha er il president da la pcd da Domat, *Philipp Ruckstuhl*, che ha fatg sortir quant gronda che la paisa politica e muntada da quella partida èn en Domat.

Avair dapli curaschi era per in maini minoritar

Il president da la pcd chantunala ha appellà en in pled magistral da far patratgs co ins pudessia frenar il trait enavos da la pcd. Profil saja da gudagnar primarmain be cun esser credibel, avair in maini ed il curaschi e star consequentamain tar ina

posiziun e lingia. La rolla da la partida en il center – cun guardar ina giada dretg ed alur sanester e be procurar per maioritads – na demussia nagin format. I saja da sa drizzar tenor il princip: Tadlar, chapir ed agir.

L'iniziativa va en la faussa direcziun

Cuss. naz. *Christoph Darbellay* ha presentà cler e concis il cuntegn e l'intenziun da l'iniziativa dal pievel «Cunter l'immigraziun da massa» da la pps. Quella periclitoschia las cunvegns bilaterals cun l'Uniun Europea ed uschia era plaz da lavur e la bainstanza da la Svizra. Cun vulair frenar l'immigraziun dals esters e

reintroducir ils contingents persuerter na schlian ins insumma nagut. La Svizra saja entretschada tant politicamain sco oravant tut economicamain fitg ferm cun l'Uniun Europea. 60% dals exports svizzers gjajan en direcziun Uniun Europea. Noss pajais dovria era forzas da lavur da l'ester, tant spezializadas sco era generalas, per che pliras spartas da l'economia svizra possian insumma funcziunar.

Cun dir gea a questa iniziativa na vegniss zunt nagin problem schlià, mabain novs creads e la situaziun per la Svizra daventass fitg precara. Cun 87:0 vuschs ed ina abstenziun vegn decidì la parola na.

Las parolas per las duas ulteriuras votaziuns federalas ha la suprastanza da la pcd fixà. Uschia è ina maiortad da quella encounter «La finanziaziun da l'abort è chausa privata» – cun sa chapescha deplorar scadina stgatschada, ma ch'il problem per propi na saja betg schliabel cun questa proposta. In cler gea hai dà per finanziaziun l'amplificaziun da l'infrastructura da viafier.

Na dismetter la taglia da cultus en il Grischun

Sut in titel dètg confus «Main taglia per il mastergn» han ils giuvens liberals lantschà en il Grischun – e restads fin uss praticamain persuls e senza sustegn – ina iniziativa dad abolir la taglia da cultus per personas giuridicas. Tant la regenza, il cussegl grond sco era las partidas han ditg na. Tenor questa iniziativa duessan las baselgias surpigliar sezzas ils custs per il cultus. Uschia na pudess il chantun betg pli incassar questa taglia.

La baselgia catolica chantunala ha survegnì per 2012 na main ch'enturn 4,3 milliuns da quella taglia u 54,3 perentschient, segund il dumber dals catolics, la reformada 3,6 milliuns. Dals total 4,7 milliuns da la baselgia catolica èn 2,7

milliuns ids als cumins-baselgia e per las atgnas instituziuns e diversas contribuziuns. La baselgia catolica chantunala finanziescha 90% da sias expensas cun la taglia da cultus da personas giuridicas. Sche questa taglia vegniss abolida mancassan a las duas baselgias chantunals 8 milliuns francs ad onn. La persuna giuridica vegniss distgargiada per sulet 0,4 perentschient da la grevezza fiscala.

Deputà *Plazi Berther*, Sedrun, parsura da la cumissiun administrativa dal Corpus Catholicum, ha presentà concentradamain ils arguments dal comité d'iniziativa per mantegnair la taglia da cultus da personas giuridicas. E la pcd ha alur decidì – sin sia proposta – unanimamain da refusar l'iniziativa dals giuvens liberals.



Referents tar la pcd grischuna: Cusseglie nazional *Christoph Darbellay* (dretg) e deputà *Plazi Berther*.